

BERTUKAR-TUKAR HADIAH MELALUI UNDIAN MENURUT MAZHAB AL-SYAFIE

Mohd Rofaizal Ibhram¹, Dr Mohamed Yusef Niteh²

Kolej Universiti Islam Antarabangsa Selangor (KUIS)

ABSTRAK

Bertukar-tukar hadiah atau memberi hadiah dengan niat untuk mendapat balasan daripada penerima di kenali dalam Fiqh Islami sebagai الهبة ذات الثواب. Bertukar-tukar hadiah di kalangan peserta sesebuah program seperti program hari keluarga, re-union, sukaneka dan sebagainya sudah menjadi popular di kalangan masyarakat Malaysia. Sebagai sebuah “acara” yang melibatkan harta atau barang-barang bernilai sudah tentu penelitian dari sudut Syariah perlu dilakukan agar tidak termasuk dalam perbuatan “mengambil harta orang lain secara batil”. Setiap peserta program perlu membawa hadiah sebagaimana yang di syaratkan oleh penganjur dan kemudian menyerahkan hadiah tersebut kepada penganjur serta membuat undian dan nama siapa yang tertera di kertas undian, orang itulah yang akan menerima hadiah tersebut. Para ulamak silam dari pelbagai mazhab telah membincangkan perkara ini dalam penulisan mereka dan memberikan pandangan masing-masing. Penelitian penulis dari pelbagai sumber mengenai isu ini menemui bahawa program bertukar hadiah antara peserta-peserta program dengan cara undian mengandungi elemen pelanggaran Syarak yang serius sebagaimana pandangan yang di utarakan oleh beberapa ulamak timur tengah di laman-laman web mereka. Penulisan ini akan mengengahkan pandangan ulamak dalam isu **BERTUKAR HADIAH MELALUI UNDIAN**.

Pendahuluan

Pemeliharaan harta merupakan suatu tuntutan dalam Islam yang wajib di patuhi. Mematuhi arahan Syara’ dalam memelihara harta bermaksud setiap orang Islam perlu memastikan bahawa harta miliknya tidak diserahkan kepada pihak yang tidak sepatutnya atau membelanjakan wang kearah perkara yang boleh membinasakan hartanya atau harta orang lain. Sebarang bentuk pemberian harta kepada pihak kedua atau ke tiga perlu di pastikan dengan jelas prinsip dan aturan Syarak yang berkaitan dengan perkara yang hendak di lakukan. Kajian ini merupakan kajian diskriptif yang bertujuan untuk mengkaji dan menerangkan sesuatu fenomena yang sedang berlaku iaitu bertukar-tukar hadiah melalui undian yang sering diadakan dalam program-program santai yang bertujuan “suka-suka”. Kajian ini merupakan penyelidikan kepustakaan (library research) untuk mendapatkan data-data yang relevan sebagai pembuka gambaran tentang isi tajuk dan sebagai hipotesis tulisan ini.

¹ Pensyarah Pusat Pengajian Teras, KUIS.

² Pensyarah Pusat Pengajian Teras, KUIS.

Hadiah dan Hibah

Penulis kitab al-Fiqh al-Manhaji menyatakan bahawa hibah ialah akad yang memberi faedah pemilikan 'ain tanpa mengharapkan balasan dari penerima semasa hidup, secara sukarela.³

Imam al-Syafie membahagikan pemberian (العطايا) kepada beberapa bahagian:

1. Pemberian yang berkait dengan kematian iaitu wasiat
2. Pemberian yang berkuat kuasa serta merta dan terbahagi kepada dua:
 - i. Semata-mata untuk memberi pemilikan kepada seseorang seperti hibah, sedekah dan hadiah.
 - ii. Wakaf

Dalam mazhab al-Syafie memberi pemilikan kepada seseorang tanpa mengharapkan apa-apa balasan di namakan sebagai hibah dan hadiah ialah untuk memuliakan seseorang manakala sedekah pula ialah memberi milik suatu harta kepada seseorang yang memerlukan untuk mendekati diri kepada Allah. Perbezaan lain antara hibah dan hadiah ialah hibah berbeza dengan hadiah kerana hadiah perlu di pindahkan dari satu ke tempat yang lain atau di bawa kepada penerima maka oleh yang demikian menurut mazhab al-Syafie pemberian harta tak alih seperti tanah tidak boleh di sebut dengan istilah hadiah.

Secara umumnya perbezaan lafaz antara hibah, sedekah dan hadiah adalah sudut keumuman dan pengkhususan. Dari sudut pengumuman istilah, perkataan sedekah dan hadiah adalah hibah manakala dari sudut pengkhususannya pula hibah bukan hadiah dan sedekah⁴.

Menurut Ibnu Hajar hibah digunakan untuk menunjukkan makna umum bagi segala bentuk pemberian termasuklah ibra' iaitu menggugurkan hutang dari penghutang, sedekah iaitu hibah atau pemberian semata-mata untuk mendapat ganjaran akhirat dan hadiah iaitu pemberian yang mengikat penerima untuk memberi balasan kepada pemberi. Hibah juga digunakan untuk memberikan makna yang lebih khusus iaitu pemberian daripada seseorang yang tidak mengharapkan apa-apa balasan dan hibah dengan makna yang khusus inilah yang telah di takrifkan oleh para ulamak sebagai pemberian yang memberi pemilikan kepada penerima tanpa apa-apa balasan.⁵

Pada pengamatan penulis perbezaan istilah ini ialah untuk menentukan niat pemberi dan juga keadaan orang yang menerima. Jika pemberian tersebut di lakukan tanpa ada niat untuk mendapatkan balasan maka di lihat kepada penerima. Jika penerima seorang yang memerlukan maka pemberian tersebut adalah sedekah dan jika penerima bukan seorang yang berhajat maka dilihat samada pemberian tersebut sebagai menghargai seseorang atau menghormati kedudukannya samada pemberi dan penerima sama taraf atau berbeza taraf sebagaimana pandangan imam al-Nawawi maka itu adalah hadiah dan jika sekiranya pemberian tersebut semata-mata pemberian maka itu adalah hibah.

³ Al-Fiqhul Manhaji 'Ala Mazhabil Imam al-Syaafi'iy – Dr Mustafa al-Khin, Dr Mustafa al-Bugha dan 'Ali al-Syarbaji, jld 3, ms 101, cetakan keenam Darul Qalam, Damsyiq/ 2005.

⁴ Al-Nawawi, raudhatu al-thalibin wa 'umdatu al-muftiin, 1991, al-maktab al-Islami, Beirut.

⁵ Al-takmilah al-thaniah, al-majmu' syarh al-muhazzab, al-maktabah al-salafiyah, Madinah al-Munawwarah,

Menurut pandangan dalam mazhab hibah atau sedekah atau hadiah adalah bergantung kepada niat seseorang. Pemberian yang diniatkan untuk mendapat pahala adalah sedekah walaupun penerimanya tidak mempunyai keperluan. Menurut pandangan ini juga jika pemberi membawa dan menghantar pemberian tersebut untuk diserahkan ke tangan penerima dengan niat untuk mendapatkan pahala maka pemberian tersebut juga di anggap sedekah dan jika tanpa niat mendapatkan pahala maka pemberian tersebut adalah hadiah.⁶ Pandangan ini juga bersandarkan kepada kebiasaan penggunaan lafaz hadiah dan hibah sebagaimana yang dibincangkan dalam mazhab yang mengkhususkan perkataan hadiah kepada harta alih manakala hibah kepada harta alih dan tak alih. Namun mengkhususkan lafaz hadiah kepada pemberian harta alih tidak lain hanyalah suatu bentuk kelaziman untuk memuliakan penerima sehingga hadiah di bawakan kepadanya. Selain itu juga memperincikan perbezaan antara hadiah dan hibah juga tidak menampakan perbezaan yang jelas dalam mazhab kerana imam al-Nawawi menukulkan beberapa pandangan dari ulamak mazhab yang menyamakan antara hibah dan sedekah sebagai pemberian yang bertujuan untuk berkasih sayang dan mendekatkan hubungan.

Pandangan penulis juga bersandarkan kepada salah satu pandangan dalam mazhab yang tidak membezakan antara hibah, hadiah dan sedekah dari sudut lafaz. Menurut pandangan ini lafaz hibah, sedekah dan hadiah saling menempati satu sama lain iaitu lafaz hibah juga bermaksud sedekah dan hadiah, sedekah juga bermaksud hibah dan hadiah dan hibah juga bermaksud hadiah.⁷

Namun begitu penggunaan lafaz atau istilah antara sedekah, hibah dan hadiah juga memberi implikasi hukum yang berbeza dalam beberapa situasi. Orang yang bersumpah seperti "*Demi Allah aku tidak akan memberi hibah*" dan kemudian dia memberi sedekah atau hadiah maka orang bersumpah tersebut perlu membayar kafarah sumpah. Dalam situasi yang lain apabila seseorang bersumpah "*Demi Allah aku tidak akan memberi hadiah*" dan kemudian dia memberi hibah kepada seseorang maka orang yang bersumpah tersebut tidak perlu membayar kafarah sumpah.

Begitu juga hadiah boleh bertukar menjadi sedekah atau sebaliknya sebagaimana dalam hadis Barirah r.a yang menghadihkan daging yang disedekahkan kepada beliau kepada Rasulullah SAW.

Perbezaan Antara Hibah, Hadiah Dan Sedekah Dari Sudut Hukum

Hibah, hadiah dan sedekah adalah perkara sunat yang amat di tuntutan oleh agama. Hibah, hadiah dan sedekah berbeza antara satu sama lain dari beberapa sudut hukum. Antaranya ialah menurut pandangan yang sahih dalam mazhab al-Syafie hibah memerlukan ijab dan qabul sebagaimana akad jual-beli manakala hadiah hanya memerlukan *al-qabd* iaitu diserahkan dan diterima oleh penerima begitu juga dengan sedekah.⁸ Menurut Ibnu Sabbagh hibah tidak memerlukan ijab dan qabul sebagaimana hadiah dan sedekah kerana tidak diriwayatkan bahawa nabi SAW melafazkan lafaz qabul atau ijab bahkan nabi SAW apabila di berikan

⁶ Zad al-muhtaj bi syarh al-minhaj, 1982.

⁷ Al-bayan fi mazhab al-imam al-Syafie, al-Imrani al-Syafie al-Yamani, al-minhaj (tiada tahun)

⁸ Al-Nawawi, raudhatu al-thalibin wa 'umdatu al-muftiin, 1991, al-maktab al-Islami, Beirut. Zad al-muhtaj bi syarh al-minhaj, 1982.

hadiah baginda menerimanya dan menggunakannya.⁹ Oleh kerana hibah tertakluk kepada sighthab ijab dan qabul sebagaimana pandangan yang sahih dalam mazhab maka hibah tidak boleh di sandarkan kepada syarat dan juga tempoh masa sebagaimana akad-jual beli kerana hibah ialah memberi pemilikan kepada seseorang yang berkuat kuasa serta-merta. Menurut mazhab juga barang yang dihibahkan mestilah diketahui dengan jelas kerana hibah ialah pemberian yang memberi pemilikan serta merta kepada penerima sebagaimana jual-beli. Menurut pandangan yang masyhur dalam mazhab hadiah dan hibah tidak menjadi milik penerima melainkan setelah di diterima oleh penerima¹⁰.

Oleh yang demikian pemberi hibah mempunyai hak khiyar iaitu memilih samada untuk meneruskan hibah atau sebaliknya selagi barang yang di hibahkan tidak diterima atau masih belum sampai kepada penerima begitu juga jika penerima hibah mengambil hibah sebelum mendapat keizinan pemberi. Jika pemberi hibah memberi keizinan untuk penerima mengambil hibah lalu kemudian menarik balik keizinan tersebut sebelum sempat penerima mengambilnya maka keizinan tersebut terbatal dengan sendirinya.¹¹

Walau terdapat perbezaan dari sudut hukum antara hibah, sedekah dan hadiah namun mazhab berpandangan bahawa hibah atau hadiah tidak berpindah milik kepada penerima melainkan setelah di serahkan dan diterima oleh penerima¹². Oleh itu penggunaan perkataan hibah atau sedekah tidak banyak bezanya dari sudut pemilikan barang yang di hibahkan atau di hadiahkan. Pemberi hadiah masih boleh menarik balik hadiahnya selagi belum di serahkan dan diterima oleh penerima. Pemberian hadiah juga tidak boleh diikat dengan syarat menurut pandangan fuqaha' mazhab yang tidak membezakan hibah, hadiah dan sedekah begitu juga dari sudut barang yang di hadiahkan mestilah jelas dan diketahui.

Hibah Dan *I'wadh al-hibah* Dan Hibah dengan syarat balasan

Jumhur ulamak bermazhab al-Syafie berpandangan bahawa hibah yang di syartkan ada *'iwadh* adalah jual-beli dan hanya sah jika *'iwadh* tersebut di ketahui dengan jelas. Sebagaimana pandangan dalam mazhab al-Syafie imam Malik mempunyai pandangan yang serupa iaitu jika pemberian hibah disertai dengan syarat *iwadh*/balasan maka hibah mengambil hukum jual beli.¹³

Hibah yang di syartkan *iwadh* terbahagi kepada *iwadh ma'lum* (yang diketahui) dan *iwadh ghair ma'lum* (tidak diketahui). Menurut pandangan dalam mazhab al-Syafie apabila *iwadh* di nyatakan dengan jelas dalam akad hibah maka akad menjadi sah dan jika sebaliknya maka menurut pandangan jumhur pemberi hibah tetap berhak menerima *iwadh* dan terbatal menurut imam al-Ghazali kerana telah bertukar kepada akad jual-beli.¹⁴ Manakala menurut satu pandangan dalam mazhab al-Syafie hibah menjadi batal jika *'iwadh* tidak diketahui kerana pertukaran hadiah tersebut tidak sah diandaikan sebagai jual beli kerana

⁹ Hadis yang di riwayatkan oleh imam al-Bukhari (2573) dari Sa'b Bin Juthamah. Al-bayan fi mazhab al-imam al-Syafie, al-Imrani al-Syafie al-Yamani, al-minhaj (tiada tahun)

¹⁰ Al-Nawawi, raudhatu al-thalibin wa 'umdatu al-muftin, 1991, al-maktab al-Islami, Beirut.

¹¹ Ibid

¹² Ibid

¹³ Al-majmu' syarh muhazzab j/15 m/s 375

¹⁴ Raudhat al-tholibin wa umdatu al-muftin j/5 m/s 387

ketidaktentuan tukaran dan tidak sah pula diandaikan sebagai hibah kerana disebutkan *'iwadh*.¹⁵

Pandangan lain dalam mazhab ialah hibah menjadi batal kerana berlawanan dengan maksud sebenar hibah dan menurut satu pandangan lain hibah tetap kekal sebagai hibah. Melihat kepada pandangan pertama dalam mazhab maka hukum pemberian hibah tersebut berubah menjadi jual-beli dan pendapat inilah yang terpakai dalam mazhab menurut pandangan jumhur ulamak.¹⁶

Daripada pandangan-pandangan ulamak yang di nukilkan maka jelas menurut pandangan jumhur ulamak mazhab al-Syafie hibah yang di sayaratkan tukaran dalam akad adalah jual beli.¹⁷

Nilai balasan hibah

Mengenai nilai balasan pula secara umumnya ulamak berbeza pandangan samada balasan tersebut mesti sama dengan hadiah yang di berikan, atau mengikut uruf atau cukup sekadar sesuatu yang berharga. Ulamak mazhab al-Syafie juga bersetuju bahawa pemberi hadiah atau hibah berhak untuk menarik balik pemberiannya jika balasan yang di terimnya tidak setimpal dengan pemberiannya atau tidak dianggap sebagai balasan pemberian oleh uruf.¹⁸

Program Bertukar Hadiah Dengan Undian

Slot pertukaran hadiah kebiasannya di lakukan dalam program hari keluarga, hari perjumpaan semula dan hari sukaneka. Setiap peserta program perlu membawa hadiah sebagaimana yang di syaratkan oleh penganjur untuk slot program bertukar hadiah sesama mereka dan kemudian menyerahkan hadiah tersebut kepada penganjur serta membuat undian.

Setiap hadiah akan di "tagged" dengan nombor dan nombor tersebut kemudiannya di masukkan ke dalam satu bekas. Setiap nombor yang di letakan dalam bekas undian mewakili hadiah-hadiah yang dikumpulkan dari setiap peserta. Peserta yang datang dengan hadiah akan di berikan hak untuk membuat cabutan dan nombor yang di cabut oleh peserta bermaksud beliau akan menerima hadiah dari peserta lain namun tidak diketahui isinya dan dari siapa.

Kesimpulan:

1. Pemberian hadiah yang disyaratkan mendapat balasan telah berubah hukum menjadi jual-beli dan bukan lagi hibah seperti mana pandangan jumhur ulamak al-Syafie. Namun menurut pandangan jumhur ulamak hibah hanya bertukar menjadi jual-beli jika disyaratkan *'iwadh* dalam akad dan tidak menjadi jual beli jika tidak disebutkan atau dilafazkan dalam akad walaupun menjadi tradisi bahawa penerima hibah akan

¹⁵ Al-musuah al-fiqhiyyah, mughni al-muhtaj ila ma'rifat al-faz al-minhaj j/2 m/s 522, al-mughni j/8 m/s 280

¹⁶ mughni al-muhtaj ila ma'rifat al-faz al-minhaj j/2 m/s 522, Syarh muntaha iradat j/3 m/s 184, al-qawanin al-fiqhiyyah li Ibni al-Jazi al-Maliki

¹⁷ mughni al-muhtaj ila ma'rifat al-faz al-minhaj j/2 m/s 522, Al-ma'ani al-badi'ah fi makrifati ikhtilaf ahli al-syariah j/2, m/s 119-124

¹⁸ Raudhat al-tholibin wa umdatu al-muftin j/5 m/s 385

membalasi pemberian tersebut di masa hadapan. Walaupun peserta program bertukar hadiah tidak meletakkan syarat mendapat balasan daripada hibahnya namun setiap peserta mengharapkan balasan daripada hibahnya.¹⁹

2. Antara rukun dan syarat-syarat hibah ialah penerima hibah mestilah wujud dan diketahui serta tertentu. Namun dalam program bertukar-tukar hadiah pemberi tidak mengetahui siapakah yang akan menerima hadiahnya kerana masing-masing peserta akan menerima hadiah daripada peserta yang lain berdasarkan undian atau cabutan nama/nombor yang disediakan oleh penganjur.
3. Undian yang diadakan untuk menentukan penerima hibah juga mengandungi masalah kerana situasi tersebut menjadikan hibah tersebut tidak diserahkan kepada penerima melainkan dengan syarat namanya diundi oleh peserta lain untuk menerima hibahnya. Ini menjadikan penerima hibah tidak mengetahui hibah siapakah akan menjadi miliknya dan siapa pula yang akan menerima hibahnya.
4. Undian juga menjadikan hibah “tergantung” iaitu peserta hanya akan layak menerima hibah jika apabila namanya telah diundi dan situasi juga bertentangan dengan pendapat jumur ulamak yang menegah hibah bersyarat.
5. Pemberian hibah dengan cara pengundian juga mengandungi unsur gharar/ketidakpastian yang jelas kerana peserta tidak mengetahui hadiah yang akan diterimanya dari pihak lain. Gharar/ketidakpastian di sini ialah penerima tidak dapat memastikan nilai hadiah yang akan diterimanya samaada lebih bernilai dari hadiahnya atau sebaliknya dan perkara ini sudah tentulah akan menyebabkan ketidakpuasan hati sesetengah pihak jika dia menerima hadiah yang begitu rendah nilainya berbanding hadiah yang diberikannya.
6. Hibah juga tidak berpindah milik kepada mana-mana penerima disebabkan ketiadaan qabd dari pihak yang diserahkan kerana belum diketahui siapakah yang akan menerima hadiah sehinggalah undian di lakukan.

Wallahua’lam.

Rujukan

1. Al-Fiqhul Manhaji ‘Ala Mazhabil Imam al-Syaafi’iy – Dr Mustafa al-Khin, Dr Mustafa al-Bugha dan ‘Ali al-Syarbaji, cetakan keenam Darul Qalam, Damsyiq/ 2005.
2. Al-Khatib al-Syirbini, Mughni al-muhtaj ila ma’rifat al-faz al-minhajl, dar al-ma’rifah, Beirut, Lubnan,1997.
3. Muhammad Bin Abdillah Bin Abi Bakr, al-ma’ani al-badi’ah fi makrifati ikhtilaf ahli al-syariah , dar al-kutub al-ilmiiyyah, Beirut,Lubnan,1999.

¹⁹ Dalam kitab *al-jawahir al-saniyyah* (Syeikh Daud Abdullah al-fathani m/s 110.) contoh-contoh yang diberikan pengarang kitab mengenai helah untuk mengelakkan jual-beli terlibat dengan riba ialah dengan menggunakan lafaz hibah, bukan jual beli seperti “ *ini emasku aku beri akan dikau*” dan kata taulannya “*emas ini aku beri akan dikau*” maka tidak menjadi riba walaupun tidak sama timbangan. Jadi dalam mazhab al-Syafie hibah bertukar menjadi jual-beli jika disebutkan dalam akad “*aku hibahkan kamu ini dan kamu hibahkan aku itu*” dan tidak menjadi jual beli jika disebut “ *aku hibahkan kamu ini*” dan jawab penerima “ *aku hibahkan kamu itu*” namun hukumnya adalah makruh.

4. Al-Nawawi, raudhatu al-thalibin wa 'umdatu al-muftiin,1991, al-maktab al-Islami,Beirut. Zad al-muhtaj bi syarh al-minhaj,1982.
5. Al-qawanin al-fiqhiyyah li Ibni al-Jazi al-Maliki
6. Al-Nawawi, Al-majmu' syarh muhazzab, Jeddah, Saudi.
7. Al-musuah al-fiqhiyyah
8. Al-Imrani al-Syafie al-Yamani Al-bayan fi mazhab al-imam al-Syafie, , al-minhaj (tiada tahun)
9. Zad al-muhtaj bi syarh al-minhaj,1982.
10. Al-takmilah al-thaniah, al-majmu' syarh al-muhazzab, al-maktabah al-salafiyah,Madinah al-Munawwarah.